

**Avatangiisit innarlitsaaliorneqarnissaannik Inatsisartut peqqussutaata
allanngortinneqarneranik Inatsisartut peqqussutaat nr. 14, 31. oktober 1996-imeersoq
Atuussimasoq (Historisk)**

§ 1.

Avatangiisit innarlitsaaliorneqarnissaannik Inatsisartut peqqussutaanni nr. 12-imi 22. december 1988-imeersumi peqqussutikkut nr. 7-ikkut 13. maj 1993-imeersukkut allanngortinneqartumi allannguutigittinneqassapput:

1. § 7-ip kingorna uku ilanngunneqassapput:

" § 7 a. Illoqarfiit nunaqarfiillu killeqarfiisa iluini assartuutit motorinik ingerlatillit aqqusinerni, illut akornini aqqusinerni, biilini inissiisarfinni assigisaannilu taamatut atorineqartussatut naatsorsuussani taamaallaat atorineqarsinnaapput.

Imm. 2. Illoqarfiit nunaqarfiillu killeqarfiisa iluini nunaminertat imm. 1-imi taaneqartut avataanni kommunalbestyrelsi sulinerlut atattillugu angallassinermut assigisaannullu piffissaa killilerlugu immikkut akuersissuteqarsinnaavoq. Piffissap immikkut akuersissuteqarfiup naanerani nunaminertat ileqqumittut peqqissaartumik ilusileqqinneqarnissaat kommunalbestyrelsip akisussaaffigaa, taamatullu immikkut akuersissuteqarnermut atattillugu nunaminertat isikkumittut ilusileqqinneqarnissaat pillugu kommunalbestyrelsi piunasaqaateqarsinnaavoq.

Imm. 3. Illoqarfiit nunaqarfiillu killeqarfiisa iluini nunaminertat immikkut ittut assartuutitut aalajangersimasunut, assersuutigalugu qamuterallannut (snescooterinut) ingerlaarfissat aqutissalluunniit maleruaqqusatigut kommunalbestyrelsip aalajangersaavigisinnava. Maleruaqqusat atortuulersinneqarnerinut peqatigitillugu tamanut saqqummiunneqartassapput, ilisimatitsissutitullu Naalakkersuisunut nassinneqarlutik.

Imm. 4. Naalakkersuisut kommuni pisussaatisinnaavaat nunaminertanik aqutissanilluunniit immikkut ittunik aalajangersaanissamut, kommunimi illoqarfiup nunaqarfiilluunniit killeqarfiisigut ilummot avammulluunniit assartuutit motorimik ingerlatillit atorlugit assartuinissamut periarfissat isumannaarlutik.

§ 7 b. Angallassissutit sumi atorineqarsinnaanerit pillugu Naalakkersuisut nalunaarusiorsinnaapput.

Imm. 2. Nalunaarutit imm. 1-imi taaneqartut nunap ilaanut aqutsinikkut erseqqissumik nassuarneqarsimasumut atuuttussanngorlugit ilusilerneqassapput.

Imm. 3. Nalunaarutit iiran. 1-imi taaneqartut assartuutitut assigiinngitsunut malittarisassanik assigiinngitsunik imaarsinnaapput, assersuutigalugu sikkilinnut qaqqakkoortinut, snescooterinut, assartuutitut nunaannakkoortinut sukkaasunut sukkaatsunullu, angallatinut timmeralaanut timmeralaajunngitsunullu, timmisartunut motorimik ingerlatilinnut il.il.

Imm. 4. Nalunaarutit imm. 1-imi taaneqartut imatut ilusilerneqarsinnaapput
a) nunaminertanik killilersuutitut/ assartuutit ilaasa atorineqarnissaannik inerteqquteqarfiusutut

imaluunniit

b) nunaminertanik killilersuutitut assartuinermilu aqqutigineqartussatut, assartuutit ilaasa atorneqarnissaannik akuersissuteqarfiusutut, nunaminertap sinnerani ataatsimut isigalugu atuinissamik inerteqquteqarfiusutut.

Imm. 5. Nalunaarutit imm. 1-imi taaneqartut assartuutit siu-nertanut immikkut ittunut atorneqarnissaannik Naalakkersuisut immikkut akuersissuteqarsinnaanerannut periarfissaat pillugit tunaartarisassanik imaqassapput, assersuutigalugu piniarnermik ingerlatanut, pisortat assartuinerinut, ilisimatusarnikkut ingerlatanut allatigullu killilimmik atuinernut atatillugu.

§ 7 c. § 7 a-mi aamma 7 b-mi killilersuutit taaneqartut annaassiniarnernut, politiit misissuinerinut assigisaannullu atatillugu assartuinerinut atuutinngillat.

Imm. 2. § 7 b-mi killilersuutit taaneqartut Naalakkersuisut kommunalbestyrelsillu avatangiisinik pinngortitamillu nakkutil-liinerannut atatillugu atuutinngillat."

2. § 46, imm. 2-mi "§ 7 malillugu" uuminnga taarserneqassaaq "§ 7, § 7 a aamma 7 b malillugit".

§ 2.

Inatsisartut peqqussutaat manna 1. november 1996 aallarnerfigalugu atortuulersinneqarpoq.

Namminersornerullutik Oqartussat, ulloq 31. oktober 1996.

Lars Emil Johansen

/

Marianne Jensen